



**Broj:** 02-04-1160/23

**Datum,** 30.10.2023. godine

## **ZAPISNIK** sa 30. redovne sjednice 7. saziva Općinskog vijeća Doboj Istok

Trideseta redovna sjednica 7. saziva Općinskog vijeća održana je dana 26.10.2023. godine u zgradi općine Doboj Istok u Klokočnici sa početkom u 10,00 sati.

**PRISUTNI:** 17 vijećnika, Kemal Bratić, općinski načelnik, Omer Hadžić, savjetnik općinskog načelnika, Arnela Aljić, ovlaštena državna službenik da obavlja poslove sekretara općine, Sulejman Delić, pomoćnik općinskog načelnika za civilnu zaštitu, Samir Mujkić, pomoćnik općinskog načelnika za poduzetništvo i finansije, Abdulah Hrnjičić, pomoćnik općinskog načelnika za prostorno uređenje, Jasmina Škrebo, direktorica JU za predškolski odgoj i obrazovanje „Dječija radost“ Doboj Istok Admir Dautović, predstavnik JU Mješovita srednja škola Doboj Istok, Emina Mešić, predstavnica JU Osnovna škola „Klokočnica“, Almasa Babić, predstavnica JU Osnovna škola „Brijesnica“ i Agan Delić, predsjednik MZ Stanić Rijeka i Fahrudin Kurtović, predstavnik Televizije Tuzlanskog kantona.

Sjednicu je otvorio i vodio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Prije nego što krenemo sa 30. redovnom sjednicom da utvrdimo prisutnost vijećnika. Znači prisutno je svih 17 vijećnika. Poštovani vijećnici, uvaženi načelnice, pomoćnici načelnika, predstavnici škola i obdaništa, gosti, savjetniče načelnika, sekretaru vijeća, tehnički sekretaru, mediji sve vas srdačno selamim i pozdravljam. Zamolio bih sve da budemo ekspeditivni, a naravno koristit ćemo i Poslovnik o radu da ne istupamo i onako kako je propisano u Poslovniku tako ćemo se i ponašati.“

### **USVAJANJE ZAPISNIKA SA PRETHODNE SJEDNICE OPĆINSKOG VIJEĆA**

Nusret Dautović, predsjedavajući Općinskog vijeća: „Dobili ste Zapisnik sa prethodne sjednice Općinskog vijeća. Javlja li se neko za riječ po zapisniku? Niko ne javlja, ko je za ovakav zapisnik?“  
 Glasanje: ZA – 17, PROTIV – 0, UZDRŽANIH – 0.

### **VIJEĆNIČKA PITANJA**

Nusret Dautović, predsjedavajući Općinskog vijeća: „Izvolite. Javlja li se neko za riječ po vijećničkim pitanjima? Ne vidim da se iko javlja. Imamo izjašnjene načelnika po inicijativi. Na 29. redovnoj sjednici Općinskog vijeća Doboj Istok koja je održana dana 28.09.2023. godine vijećnica Emira Karić postavila je sledeću vijećničku inicijativu: Postavljanje stacioniranog radara na području općine Doboj Istok.

Mišljenje:

Ideju za predloženu inicijativu smatramo dobrom. Općina Doboj Istok da ima mogućnost postavila bi stacionirane radare u svaku mjesnu zajednicu i na taj način riješila postojeće probleme. Međutim, predložena vijećnička inicijativa nije u nadležnosti općine Doboj Istok.

S poštovanjem, općinski načelnik Kemal Bratić.“

### **USVAJANJE DNEVNOG REDA**

Nusret Dautović, predsjedavajući Općinskog vijeća: „ Za današnji dnevni red bilo je predviđeno 13 tačaka, ali dobili smo prijedlog za proširenje dnevnog reda sa još jednom tačkom i ja ću je predočiti: Razmatranje i usvajanje prijedloga Odluke o davanju saglasnosti na Pravilnik o izmjenama i dopunama

Pravilnika o unutrašnjoj organizaciji općinskih službi za upravu općine Doboj Istok. Ko je za proširenje dnevnog reda sa ovom tačkom?

Glasanje: ZA – 13, PROTIV – 0, UZDRŽANIH – 4.

Konstatujem da je sa 13 za i 4 uzdržana prihvaćen prijedlog za proširenje dnevnog reda. Pošto je prijedlog odluke predlažem da ide kao 1. tačka dnevnog reda. Ko je za ovakav prijedlog da ide kao 1. tačka dnevnog reda?

Glasanje: ZA – 13, PROTIV – 0, UZDRŽANIH – 4.

Konstatujem da je 13 za i 4 uzdržana. Ja ću sada pročitati kompletan dnevni red:

1. Razmatranje i usvajanje prijedloga Odluke o davanju saglasnosti na Pravilnik o izmjenama i dopunama Pravilnika o unutrašnjoj organizaciji općinskih službi za upravu općine Doboj Istok,
2. Razmatranje i usvajanje Rebalansa Budžeta općine Doboj Istok za 2023. godinu,
3. Razmatranje i usvajanje prijedloga Odluke o obuci vijećnika Općinskog vijeća Doboj Istok,
4. Razmatranje i usvajanje prijedloga Odluke o utvrđivanju uslova i kriterija za izbor i imenovanje članova radnih tijela Općinskog vijeća Doboj Istok,
5. Razmatranje i usvajanje prijedloga Odluke o prihvatanju prava svojine i posjeda na parceli k.č. broj 3682/19 K.O. Klokočnica,
6. Razmatranje i usvajanje Izvještaja o radu JU za predškolski odgoj i obrazovanje „Dječija radost“ za pedagošku/školsku 2022/2023. godinu,
7. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu,
8. Razmatranje i usvajanje Informacije o uspjehu učenika i postignutim rezultatima JU OŠ „Klokočnica“ za 2022/2023. godinu,
9. Razmatranje i usvajanje Informacije o uspjehu učenika i postignutim rezultatima JU OŠ „Brijesnica“ za 2022/2023. godinu,
10. Razmatranje i usvajanje Informacije o uspjehu učenika i postignutim rezultatima JU MSS Doboj Istok za 2022/2023. godinu,
11. Razmatranje i usvajanje Informacije o upisu učenika u prve razrede JU OŠ „Klokočnica“ za 2023/2024. godinu,
12. Razmatranje i usvajanje Informacije o upisu učenika u prve razrede JU OŠ „Brijesnica“ za 2023/2024. godinu,
13. Razmatranje i usvajanje Informacije o upisu učenika u prve razrede JU MSS Doboj Istok za 2023/2024. godinu,
14. Razmatranje i usvajanje Programa obilježavanja Dana državnosti BiH.

## **REALIZACIJA DNEVNOG REDA**

1. **Razmatranje i usvajanje prijedloga Odluke o davanju saglasnosti na Pravilnik o izmjenama i dopunama Pravilnika o unutrašnjoj organizaciji općinskih službi za upravu općine Doboj Istok.**

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Mehmed Mehinović, predsjednik kluba vijećnika SBiH-SDP: „Gospodine predsjedavajući, dopredsjedavajući, kolegice i kolege vijećnici, predstavnici izvršne vlasti, poštovani direktori iz Doboj Istoka i naš poštovani Fahro iz medija želim sve da vas poselamim i pozdravim. Evo kao i predsjedavajući nadam se da ćemo biti efikasni i konstruktivni i da ćemo raditi kako treba. Odmah na početku da neko ne kaže da niko nije pročitao i da smo prošli tek tako, čini mi se u odluci koja je ponuđena, a ako sam ja u krivu prihvatam svoju grešku, stoji dole datum 29.12.2022. godine. Da li je to tehnička greška ili ne znam šta, ali bi bilo lijepo da se to ispravi. Pravilnik ko pravilnik, zna se kako se skicira i ko ga skicira i u određenom trenutku prilagođava ga datim potrebama i poslovnika koji će se obaviti u narednom periodu. Međutim ja sam dužan da skrenem pažnju zbog zapisnika i zbog javnosti i da na neki način kažem da nikako ne mogu prihvatiti radno mjesto viši samostalni referent za poduzetništvo, finansije i planiranje razvoja. Između ostalog u njegovim radnim obavezama stoji da radi na izradi nacrtu i prijedloga budžeta, izmjenama budžeta i odluke o izvršenju budžeta. Mi dobro znamo da su dva najvažnija dokumenta u jednoj lokalnoj zajednici statut općine i budžet. U opisu stoji poslovi stručno-operativni, administrativno-tehnički i računovodstveno-materijalni, vrsta djelatnosti – dopunski poslovi, složenost poslova – složeni, namještenik više školske sprema, a može i neki drugi. Ja smatram, obzirom da je ovo glavni dokumenat u općini, da liči kao kada bi statut pravio neko

drugi, a ne Aljićka ili Omeriskusni pravници, isto tako ponuditi budžet uz svo uvažavanje, jer ima ljudi koji znaju i moje lično mišljenje je da ovdje mora biti visoka stručna sprema, jer se radi o stvarno složenim poslovima, a budžet nije tako lako napraviti i ne bi ga trebalo podcjenjivati. Ja znam da to vjerovatno neće proći zbog određenih razloga, ali evo zbog moje struke i mog znanja tih poslova dužan sam da skrenem pažnju. Isto tako viši samostalni referent za knjigovodstvene poslove stoji tamo da otvara usaglašavanje poslovnih knjiga između dužnika i povjerilaca i taj knjigovođa treba znati bruto bilans i treba znati određene stvari šta duguje i potražuje i kako se knjiži i stoji fakultet prvog stepena ili viša škola društvenog ili tehničkog smjera. Ja smatram da ni u kom slučaju ne bi trebalo ovdje da stoji tehničkog smjera. Ne znam šta neki tehničar zna oko knjigovodstvenih promjena, saldiranja i unošenja stavki itd. Sve ostalo nema nikakvih problema i ovo treba donijeti naravno, a ovo su neke stvari na koje iz profesionalnih razloga treba da skrenem pažnju i da treba da stoji ovako kako sam komentarisao. Ako i ostane ovako ja nemam problema da glasam, jer znam da će ovo proći, međutim ovo je podcjenjivanje budžeta po meni pogotovo sada u datim trenutcima kada nemamo ni pomoćnika ekonomske struke i praviti budžet na takav način i izvještavati o budžetu na takav način i zato se dešava ovo što se dešava da često dolazimo u nedoumice po pojedinim stavkama. Bez ikakvog ciljanja, bez ikakvih uvreda ovo je samo profesionalna deformacija da pokušam da usmjerim ljude da pokušaju da postave ovako kako treba.“

Nusret Dautović, predsjedavajući Općinskog vijeća: „Hvala lijepo vijećniče Mehinović. Javlja li se još neko za riječ po ovoj tački? Ukoliko se niko ne javlja, vijećnik Mehinović je imao ove primjedbe i hoćemo li izjasniti prvo o primjedbama ili za prijedlog Odluke? Prvo ću ponuditi prijedlog Odluke. Ko je za ovakav prijedlog Odluke?“

Glasanje: ZA – 10, PROTIV – 0, UZDRŽANIH – 7.

Konstatujem da je ova tačka usvojena sa 10 za i 7 uzdržanih i nema potrebe se izjašnjavati o prijedlozima.“

## **2. Razmatranje i usvajanje Rebalansa Budžeta općine Doboj Istok za 2023. godinu**

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Mehmed Mehinović, predsjednik kluba vijećnika SBiH-SDP: „Mislim da će jako biti korisno ovo što ću reći i nemam ništa protiv i ovo je misaona imenica za općinu Doboj Istok da je ostvaren budžet 5 miliona. Pričao sam vam da sam bio ovdje kada je bilo 300.000 budžet, pa je sada 5 miliona i tada je bila misaona imenica da ćemo doći do miliona, a vidite kako se stvari kreću naprijed. Rebalans se donosi kao i budžet, bar tako stoji u papirima i zakonima i to je prevedeno otprilike uravnoteženje stavki koje odstupaju. U toku godine može se donijeti koliko god hoćete puta ukoliko dođe do odstupanja nečega. U ovom rebalansu imamo stvarno stanje za 9 mjeseci i svaka stavka koja je ostvarena sa 75% smatra se da ide kako treba. Tu smo mi blizu negdje, ali zbog ovih namjenskih sredstava vjerovatno je došlo do određenog odstupanja i nije se desilo da bude 75%. Međutim iz profesionalnih stvari moram neke stvari sugerisati kada se radi o prihodovnoj strani. Ja lično smatram, a evo ući će u zapisnik, pa ćemo imati izvještaj o izvršenju budžeta, samo da ne bude frizirano, 716111 prihodi od poreza na dohodak od fizičkih i nesamostalnih djelatnosti ostvareni sa 92,69%. Predviđa se 1.227.000 rebalansom i to je povećanje od 234.000 KM. Smatram onoliko koliko ja znam da se ne može, jer ovo je nešto što se otprilike uplaćuje sukcesivno i obično privrednici uplaćuju porez na dohodak i podnose zahtjev i akontativno plaćaju porez kako ide. On ima dobar procenat i ne znam odakle, jer je računovodstveno nemoguće da bude ovoliko povećanje. Zato smatram da predlagač sagleda ovo da ne bi u decembru ponovo, a mislim da će trebati, jer se on ne može ostvariti u ovom iznosu od 1.227.000. Isto tako prihod od poreza na dohodak fizičkih lica ostvaren sa 92, a zna se kada se uplaćuju ti porezi i ne znam kako se može desiti to povećanje, po meni je nemoguće. Općinske komunalne takse 722321 ostvarene sa 97%, a predviđeno je 123.000. Ovi privrednici znaju da je nemoguće, jer komunalne takse se plaćaju po obračunu i one u prvom kvartalu budu 90% i njih nema kasnije i zato su u prvom kvartalu bile 90% ostvarene. Evo ja kažem možda ćemo praviti rebalans i u decembru i vjerovatno ćemo ga praviti, ali da budemo oprezni da ne dolazimo u zabludu, jer je to otprilike 300.000 koliko sam ja nabrojao koje i jest povećanje u rebalansu koje dešava da je rebalans i veći za toliko koliko jeste. Kada se radi o izdacima raduje me da je smanjeno ono što vijećnici troše otprilike za 15.000 što je realno i treba otprilike tako da se ponašamo domaćinski, jer rijetke su stavke koje se smanjuju, a evo na Vijeću je smanjeno. Samo da vas izvijestim na ovaj budžet u toku godine mi ćemo potrošiti 1,58%. Toliko Vijeće košta u budžetu općine i da ne bi ljudi pričali da smo skupi i da dnevnicu naplaćujemo i paušale itd. Znači 1,58 % skoro najmanje od svih budžetskih korisnika. S obzirom da nema tekstualnog dijela, narativnog dijela, u ovim budžetima i moram malo da prokomentarišem transfer za dječije obdanište i transfer Centru za socijalni rad. Iako su procenti osvarenja 75 i 77% predviđa se povećanje na oba ova budžetska korisnika. Dobro je da se može povećati samo bi bilo lijepo da je napisano iz kojih razloga, ali evo

ne znam iz kojih razloga, a predlaže to vjerovatno zna i iz tih razloga se rukovodio da poveća tim budžetskim korisnicima sredstva. Afirmativno je takođe da je Sportski savez našao svoje mjesto što je meni posebno drago 8.500 KM povećava se rebalansom i idemo skoro 100.000, 93.500 za Sportski savez što je jako dobar iskorak. Isto tako ne raduje me da su sredstva za kulturu i neke manifestacije smanjenja za 8.500, pa nije baš popularno, ali eto. Rebalans ko rebalans, rekao sam stvarno respektabilan, ali opet kažem nema narativnog dijela i teško se snaći u ovoj tabeli, ja se mogu snaći, a kako se mogu ljudi tehničkog smjera snaći ne znam ni ja i tabela je ova malo bolja, ali u tabeli moraju biti redni brojevi, pa kada se kaže u procentima kolona ta kroz kolonu tu. Ovdje se valja snalaziti, pa bi bilo dobro da se samo numerišu te kolone u narednom periodu zbog vijećnika da nam bude lakše dešifrovati o čemu se radi.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ po ovoj tački? Ukoliko se ne javlja, ko je za usvajanje Rebalansa budžeta?“

Glasanje: ZA – 11, PROTIV – 0, UZDRŽANIH – 6.

Konstatujem da je ova tačka usvojena sa 11 za i 6 uzdržanih.“

### **3. Razmatranje i usvajanje prijedloga Odluke o obuci vijećnika Općinskog vijeća Doboj Istok.**

Nusret Dautović, predsjedavajući Općinskog vijeća: „ Javlja li se neko za riječ po ovoj tački?“

Mehmed Mehinović, predsjednik kluba vijećnika SBiH-SDP: „ Naravno da ću glasati za ovu odluku, ali ako budu ovi iz MEG projekta gledali da vide da nismo pustili da to ide tek tako i hoću neke stvari jednostavno da prokomentarišem, a vezano je i za prošlu tačku rebalans budžeta. Nikada edukacija nije dosta bez obzira koliko čovjek bio pismen i koliko znao, svaka edukacija je dobro došla, jer život ide naprijed, stvari se mijenjaju i edukacija treba ići i treba slušati šta se dešava u svijetu da bi se jednostavno mogle donositi pravilne odluke. Međutim, nama je na Kolegiju ovdje jako lijepo naš kolega Hasan Hasančević objasnio o čemu se radi. Mi nismo znali, jer nismo imali ovog upozorenja od MEG projekta, a Hasko nam je jako lijepo objasnio i mi smo prihvatili da jer to tako. Međutim, čitajući ovu odluku teško mi je prihvatiti samo jednu riječ u ovoj odluci, a ona ovako glasi: ovom odlukom određuje se obavezna obuka vijećnika Općinskog vijeća. Šta će to značiti obavezuje se i čime će to regulisati? Edukacija treba to nije sporno. Sada sam rekao u rebalansu ovo Vijeće troši 1,58 %, a naređuješ mu nešto da je obavezno, naređujem vijećnicima da idu u izbore i stavljaju se javnom linču i osudi javnosti itd. Ja smatram jednostavno da je zbog ovoga obavezna obuka vijećnika, jer ovdje u dopisu od MEG-a stoji neprisuštvovanje donosica odluka pomoćnika načelnika, šefova službi i odjeljenja i vijećnici kao neka treća kategorija. Ja koliko znam ima dosta vijećnika ovdje zaposlenih u općinskim organima i često budu tu, a i mi ćemo doći kada možemo, a jednostavno da te obavezuje na nešto, a neko nije obavezan da odgovori na pitanja vijećnika i čeka se po 3 – 4 godine, a imam da moram obavezno doći na edukaciju. Ja se volim edukovati i sam se edukujem i ponekad sa ljudima razgovaram. Podržat ću ja ovakvu odluku, to nije sporno, samo me jednostavno ponukalo da je to obavezno, pa da se ispravi da to nije obaveza, ali da se dolazi na edukaciju, naravno.“

Hasan Hasančević, predsjednik kluba vijećnika SDA: „ Sve ću da poselamim i pozdravim. Ja nisam shvatio da je prisustvo obuci obavezno. Obavezni smo mi kao Vijeće donijeti odluku i u tom kontekstu je predavanje bilo. Znači da smo mi kao Vijeće obavezni donijeti odluku o edukaciji. Ne mogu ja ako sam u bolnici ili ne daj Bože, dženaža i sve te stvari podrediti obuci vijećnika. Znači obavezno je da mi donesemo odluku i da je imamo takvu kakva jest, a prisustvo je manje-više.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ po ovoj tački? Ukoliko se niko ne javlja, ko je za?“

Glasanje: ZA – 17, PROTIV – 0, UZDRŽANIH – 0.

### **4. Razmatranje i usvajanje prijedloga Odluke o utvrđivanju uslova i kriterija za izbor i imenovanje članova radnih tijela Općinskog vijeća Doboj Istok**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakvu Odluku?“

Glasanje: ZA – 17, PROTIV – 0, UZDRŽANIH – 0.

**5. Razmatranje i usvajanje prijedloga Odluke o prihvatanju prava svojine i posjeda na parceli k.č. broj 3682/19 K.O. Klokočnica**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ne javlja. Ko je za ovakvu Odluku?“

Glasanje: ZA – 17, PROTIV – 0, UZDRŽANIH – 0.

**6. Razmatranje i usvajanje Izvještaja o radu JU za predškolski odgoj i obrazovanje „Dječija radost“ za pedagošku/školsku 2022/2023. godinu,**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Pošto se niko se ne javlja ko je za ovakav Izvještaj?“

Glasanje: ZA – 17, PROTIV – 0, UZDRŽANIH – 0.

**7. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu,**

Nusret Dautović, predsjedavajući Općinskog vijeća: „Javlja li se još neko za riječ po ovoj tački? Ukoliko se niko ne javlja ko je za ovakvu informaciju?“

Glasanje: ZA – 17, PROTIV – 0, UZDRŽANIH – 0.

**8. Razmatranje i usvajanje Informacije o uspjehu učenika i postignutim rezultatima JU OŠ „Klokočnica“ za 2022/2023. godinu,**

Nusret Dautović, predsjedavajući Općinskog vijeća: „Samo da napomenem da su dva direktora odsutna i o tome su nas izvijestili, pa su poslali svoje predstavnike i tačke se mogu razmatrati. Javlja li se neko za riječ po ovoj tački?“

Hasan Hasančević, predsjednik kluba vijećnika SDA: „Ja ću u ime kluba SDA reći da ćemo mi podržati sve informacije i otprilike da se to radi u skladu sa našim željama i građanstva. Naravno bih pohvalio informaciju srednje škole, jer u momentu kada je situacija bila malo nezgodna direktor je prihvatio to da radi i povećao je upis i škola je funkcionisala onako kako je funkcionisala i ovom prilikom mu se zahvaljujem u ime kluba vijećnika SDA. Neću se više javljati, mi ćemo sve informacije podržati.“

Izet Hodžić, zamjenik predsjedavajućeg Općinskog vijeća: „Pošto se prvi puta javljam ja koristim priliku da poselamim i pozdravim poštovanog načelnika sa saradnicima, uvažene kolegice i kolege vijećnike, predstavnike osnovnih i srednje škole, sredstva medija, savjetnika općinskog načelnika, sekretara općine, tehničkog sekretara i pošto smo na pola sjednice Općinskog vijeća poželio bih da uspješno završimo ovu sjednicu. Komisija koja je nadležna za razmatranje ove informacije je Komisija za mlade, društvene djelatnosti i informisanje imala je sastanak povodom ovih izvještaja. Ono što želim da kažem, a dobili ste zapisnik sa ovog sastanka, Komisija je normalno sugerisala Općinskom vijeću da prihvati ove izvještaje s tim što želim da kažem, a nije ništa u lošem kontekstu, znači sugerisano je menadžmentu osnovnih škola i jednoj i drugoj, a malo manje srednjoj školi, jer razmatrali smo uspjehe učenika i u izvještajima prikazane su izuzetno dobre prosječne ocjene učenika, što nas posebno raduje. Evo jednoglasna sugestija članova Komisije prema menadžmentima škola ako se može poraditi nešto više na vannastavnom djelovanju, odnosno poboljšanju rada u sekcijama, jer kada vidimo u izvještajima da prosječna ocjena učenika ne prati dobre rezultate na takmičenjima na nivou Kantona i Federacije. Kažem ovo je jednoglasan zaključak članova komisije u najboljoj namjeri ništa lično, ali smatramo da ovaj prosjek koji je iskazan, a koji je za svaku pohvalu, treba da polučiti bolje rezultate na takmičenjima, a to je procjena Komisije, jer u ovom slučaju nije tako.“

Emira Karić, predsjednica kluba vijećnika SDP: „Ja ću pozdraviti i poselamiti sve prisutne da ne nabrajam i da to nabranje odnese više vremena nego sama diskusija. Naravno što se tiče obrazovanja ja bih ovdje mogla možda 2, 3, 4 sata, a možda i tematska sjednica itd. Jako sam uključena u tu branšu, gledam je i sa psihološke i sa pedagoške strane otprilike i vršim neka svoja istraživanja iz razloga da iz dana u dan poboljšavamo određene stvari, ali neću o tome da govorim iz samo jednog razloga. Naravno čestitam svim školama i na uspjehu i na onome što je urađeno, jer je sve teže i teže raditi u obrazovanju. Ja bih rekla ovakve informacije se ne donose na svim vijećima, ovo Vijeće je nekada donijelo u svom planu da se diskutuje kao o informaciji, ali to nije praksa svih vijeća i onda mi je malo nelogično ako se moja inicijativa koja se ne odnosi

na Općinsko vijeće ili na Općinu Doboj Istok tek tako odbaci, jer se ne odnosi, onda ste jako kontradiktorni kada izađete i raspravljate o školstvu za koje Općinsko vijeće nije nadležno.“

Hasan Hasančević, predsjednik kluba vijećnika SDA: „ Uvažena kolegica Emira bi trebala da kaže za ovom govornicom da ni jedna općina, ni jedno Općinsko vijeće ne ulaže u osnovno i srednje obrazovanje kao općina Doboj Istok. Nije jedna u Kantonu. Nije ni rekla da se to skine sa dnevnog reda ili da se ubuduće ne raspravlja, ali ako ulažemo negdje nešto valjda treba da dobijemo informaciju. Na kraju krajeva djeca su naša, a mi smo predstavnici roditelja od djece i treba javna riječ da se čuje. Evo niko niti će oboriti informaciju, niti će nešto škola bog zna dobiti i ako padne informacija ili ne padne. Tako da je dobro da je Vijeće informisano šta se dešava u školi.“

Emira Karić, predsjednica kluba vijećnika SDP: „ Meni je izuzetno zadovoljstvo što se na Vijeću općine Doboj Istok raspravlja o školstvu, znači o svim školama i to ne možete mi osporiti. Znači ja sam tu i stojim iza tačke. Isto tako ta saradnja mora da bude, mora da postoji i možda treba da budemo primjer nekim drugim općinama ako je to na ovaj način. Ja vas samo molim nemojte biti kontradiktorni. Ja ne volim kada neko nekoga ismijava, a isto tako nije mi ugodno kada neko sam sebe ismijava. Vjerujte mi, a vi eto nastavite.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ po ovoj tački? Ko je za ovakvu Informaciju?“

Glasanje: ZA – 17, PROTIV – 0, UZDRŽANIH – 0.

### **9. Razmatranje i usvajanje Informacije o uspjehu učenika i postignutim rezultatima JU OŠ „Brijesnica“ za 2022/2023. godinu**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Pošto se niko ne javlja, ko je za ovakvu Informaciju?“

Glasanje: ZA – 17, PROTIV – 0, UZDRŽANIH – 0.

### **10. Razmatranje i usvajanje Informacije o uspjehu učenika i postignutim rezultatima JU MSŠ Doboj Istok za 2022/2023. godinu**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakvu Informaciju?“

Glasanje: ZA – 17, PROTIV – 0, UZDRŽANIH – 0.

### **11. Razmatranje i usvajanje Informacije o upisu učenika u prve razrede JU OŠ „Klokotnica“ za 2023/2024. godinu,**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ne javlja. Ko je za ovakvu Informaciju?“

Glasanje: ZA – 17, PROTIV – 0, UZDRŽANIH – 0.

### **12. Razmatranje i usvajanje Informacije o upisu učenika u prve razrede JU OŠ „Brijesnica“ za 2023/2024. godinu**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakvu Informaciju?“

Glasanje: ZA – 17, PROTIV – 0, UZDRŽANIH – 0.

### **13. Razmatranje i usvajanje Informacije o upisu učenika u prve razrede JU MSŠ Doboj Istok za 2023/2024. godinu,**

Nusret Dautović, predsjedavajući Općinskog vijeća: „ Javlja li se neko za riječ po ovoj tački?“

Admir Dautović, predstavnik JU Mješovita srednja škola Doboj Istok: „ Uvaženi načelnice sa saradnicima, predsjedavajući Općinskog vijeća, dopredsjedavajući, uvaženi vijećnici, gospodo iz medija selam alejkum i dobar dan. Za one koji me ne poznaju ja sam Admir Dautović, magistar sporta, zdravlja i edukacije i profesor u Mješovitoj srednjoj školi Doboj Istok i trenutno lice ovlašteno za potpis od strane školskog odbora

*i Ministarstva obrazovanja, tj. mijenjam našeg direktora škole koji je trenutno na bolovanju. Moram izaći po ovoj tački da izrazim prije svega zahvalnost svima onima koji su dali doprinos u upisu u ovu školsku godinu koja je bila izuzetno teška, a pogotovo što idemo u tom pravcu i u ovoj školskoj godini. Nismo imali upis nikada bolji kada su u pitanju odjeljenja, znači upisali smo 7 odjeljenja ove školske godine i ove godine imamo sva stručna i tehnička zanimanja i plus gimnazija koja su upisana u registru srednjih škola Doboj Istok. Evidentno je da je manji broj upisanih učenika globalno, ne samo kod nas nego i u regionu, a to je zbog kretanja i iseljavanja kako u Bosni i Hercegovini, Tuzlanskom kantonu, pa i Doboj Istoku. Mi smo se potrudili, naravno, uz resorno ministarstvo, koje ja moram sa ovog mjesta pohvaliti, koje je dalo suglasnost da i sa manjim brojem učenika upišemo i zahvaliti se školskom odboru koje je uvijek bilo na raspolaganju da sve odluke podrži da zajedno riješimo ove probleme i naravno našem nastavničkom vijeću naše škole, a naravno i Općinskom vijeću Doboj Istok koje je uvijek imalo obzira prema nama i uvijek se stavilo na raspolaganje i saradnju.“*

*Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ? Ne javlja. Ko je za ovakvu Informaciju?“*

*Glasanje: ZA – 17, PROTIV – 0, UZDRŽANIH – 0.*

#### **14. Razmatranje i usvajanje Programa obilježavanja Dana državnosti BiH.**

*Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakav prijedlog?“*

*Glasanje: ZA – 11, PROTIV – 0, UZDRŽANIH – 6.*

*Konstatujem da je 11 za i 6 uzdržanih. Sa ovom tačkom iscrpili smo današnji dnevni red, želim svima da se zahvalim i vidimo se na svečanoj sjednici 24.11.2023. godine.“*

*Sjednica je završena u 10,40 sati.*

ZAPISNIČAR  
Behara Hadžić

OVLAŠTENI DRŽAVNI SLUŽBENIK  
DA OBAVLJA POSLOVE SEKRETARA OPĆINE  
Arnela Aljić

PREDSJEDAVALJUĆI  
OPĆINSKOG VIJEĆA  
Nusret Dautović

*Zapisnik je usvojen na 31. redovnoj sjednici Općinskog vijeća Doboj Istok održanoj dana 30.11.2023. godine.*

*U Klokočnici, dana 30.11.2023. godine*

*Zabilješku sačinila  
Arnela Aljić, ovlaštenu državnu službenicu da  
obavlja poslove sekretara općine*